

平定粵寇紀略

一函
十三冊

平定粵寇紀畧卷十七

同治三年甲子正月陝西軍克復漢中府城竝截勦
中橋各賊

髮賊豫捻陳得才等上年八月踞漢中府因金陵
圍急僞天王洪秀全遣謀約令回援於十二月間
傳僞令率在陝各路賊黨東下陝西劉巡撫蓉偵
知派令記名提督何勝必蕭慶高等督兵急攻正
月初十日破法慈院賊巢斃賊四五百人十一日
營官曾堯曾克勝等由牟家壩進擊油坊街賊壘

斬馘二千餘名各軍直薄漢中府城賊首聞大兵雲集卽圖出竄官軍乘其慌亂斬關直入四路掩殺搜斬一千餘人立將府城克復賊衆向東北奔逸分踞中橋各賊竄往城固一帶與踞賊合股官軍在牟家壩木家壩等處節節進勦復斃數千名賊衆竄撲甯陝廳又爲參將謝正球等擊退賊首李侍賢陷安徽績溪縣旋爲官軍克復

同僞侍王李侍賢勾結僞堵王黃文金及廣德州餘黨於正月初二日由甯國上竄初六日陷績溪縣

進踞雄路孔靈等處意圖直撲徽州初八日總兵
唐義訓率師自徽州出紮吳山舖俄有紅衣賊酋
帶隊擁至我軍列陣迎戰斬執旂賊數人義訓乘
賊稍卻催軍直前盡毀雄路賊館賊衆退走回顧
各山賊旂展動特援轉鬪各營奮力猛擊斬馘無
數適閩浙左總督派兵自屯溪馳至義訓會之進
攻初九日王開琳自臨溪驅賊至七里牌直抵績
溪城南賊遽返走入城義訓麾兵夾擊賊由東西
兩門逃出立將績溪克復馳剪尾股而還

浙軍收復桐鄉縣

浙江桐鄉縣城距海甯州三十餘里爲杭州通嘉興間道布政使蔣益澧飭令降將蔡元吉乘夜潛師進攻復令直隸州李邦達都司謝茂勝等各率親兵六哨與張景渠葉炳忠所部分屯東北兩門僞朝將何培章見官軍雲集勢已窮迫潛通款於都司張其光初六日隻身赴張景渠營中乞降呈繳軍械僞印遂於初八日收復縣城選其精壯列爲章字六營遣見左總督培章自請捐發所部三

月口糧竝以雙橋烏鎮爲浙西要道願率衆駐守
左總督許之後杭賊運糧嘉興行經雙橋爲培章
所邀賊之糧道遂斷

陝西軍大破上元觀賊壘連克城固洋縣二城

陝軍克復漢中賊衆分路竄逸各軍乘勝躡勦直
抵上元觀賊已築壘屯集正月十六日何勝必等
分隊設伏誘令出巢縱兵兜擊殺賊千餘人乘勝
拋擲火彈將賊壘焚燬餘賊向城固縣逃竄何勝
必會同劉岳曙等軍渡河緊追直抵城下將附城

賊壘燒燬蕭慶高等率隊奮力進攻梯城躍入賊
衆驚潰紛向東南奔竄官軍斬馘甚多當將城固
縣城克復慶高等乘勝進逼洋縣分路環攻竝潛
遣精銳入城設伏乘夜舉火爲號各軍奮勇登城
呼聲動地賊衆驚亂自相踐蹋官軍四面圍勦賊
尸累如積薪餘賊突出東門向華陽一路竄走又
將洋縣城克復

蘇州軍攻克宜興荆溪縣城

宜興荆溪二縣一城賊踞之以與金陵通聲息李

巡撫派令郭松林等營會同戈登李恆嵩進勦統
領李鶴章又令楊鼎勲率隊合擊正月十九等日
戈登派洋將美敘羅殿至宜興城外察看地勢松
林等帶隊直抵城下揮隊進勦燒燬近城各賊卡
賊開城出拒官軍分路合擊擒斬多名松林被礮
子擊穿右肘膝嗣武右骹亦傷弁勇間有傷亡二
十一日常勝軍進河東松林等陸軍進河西水師
溯流而上二十二日各軍屯三里橋常勝軍攻東
門松林等裹創再戰敗賊於上湖橋正獲勝時僞

代王黃精忠由張渚水路達西沱率黨來援拚死
進撲我軍結陣屹立但以洋槍排擊賊衆死傷相
繼尙無退志吳勝清等三路包抄殪賊甚衆賊始
奪路狂奔追殺四十餘里毀賊船千餘隻旂幟器
械無數援賊旣敗城賊之勢愈孤戈登審定地勢
督礮隊專攻東門嗣武等分攻北西南三門水師
入近城之東沱西沱兩湖邀截賊開西門而逃戈
登與松林等併力追殺竄逸無多餘衆泣涕求降
於正月二十四日將宜興荆溪縣城克復

蘇州軍疊克嘉興城外賊壘並敗湖州援賊

程學啓進規嘉興紮營城北疊有斬擒劉秉璋潘
鼎新分營朝陽橋等處賊於東北門築數堅壘正
月二十四日學啓分兵五路攻之城賊出援學啓
率親兵由小西門繞城河截賊後賊驚駭卻顧我
軍乃攻破小西門北門賊壘七座擒偽天將劉得
福慕天義賈慕仁斃悍賊千餘奪大礮五十尊而
分攻旁路之軍疊克秋涇橋吳涇橋合歡橋等處
賊壘東北門外之賊殲除殆盡時湖州賊屢竄南

木壇坵四亭子新塍思犯盛澤平望以援嘉興爲
淮揚太湖水師所敗學啓乃督各營逼城高築礮
臺二十八日督諸軍猛攻轟裂城垣十數丈城賊
拚死抗拒燃傾火藥下擊總兵何安泰等中槍陣
亡未能攻克湖州賊又犯盛澤圍王江涇後路各
營學啓派兵堵截敗之

江甯陸師攻克鍾山僞天保城扼斷太平神策二門
遂合城圍

金陵一城延亙百餘里自曾巡撫國荃駐師雨花

臺奪取附城諸要隘東西南三面悉爲我有惟東
北鍾山賊壘未克太平神策兩門未能合圍曾巡
撫商之福建水師楊提督岳斌飭派師船嚴絕江
面接濟又由曾大臣咨請總理各國事務衙門照
會泰西諸國禁止輪船泊金陵以防代送糧藥派
總兵朱洪章等繞過鍾山之後分夜輪攻兼扼句
容陸路又調駐守金柱關之總兵朱南桂移營以
助城圍正月二十日夜截殺句容護糧賊甚多二
十一日曾巡撫親督各軍至洪山北固山神策太

平等門外詳勘形勢適僞忠王李秀成自蘇城竄歸先糾大股猛撲嘉字營濠牆朱洪章等見賊抵死來犯率隊出濠夾擊賊乃返走齊登鍾山山巔有大石壘僞名天保城極堅峻曾巡撫卽飭所督各將弁攀巖直上火毬火箭從壘後直入賊多冒火突走遂將僞天保城攻克二十四日我軍在東北太平門外新築二營派湘後左右營守之維時總兵梁美材所部紮洪山朱南桂所部紮北固山堵住神策門大路自此守賊不得出郭援賊不得

入城四隅之圍始密惟賊眾十數萬而圍師不滿五萬分布百餘里仍以窮寇奔突爲虞

粵賊勾結皖豫各捻匪同擾楚邊楚軍分勦被圍於霸山旋獲大捷

髮賊陳得才等欲援金陵勾結皖豫各捻匪同竄豫楚邊境議於河南之南陽湖北之襄陽二府會齊合股下竄皖捻王庭幹一股及苗沛霖餘黨苗添馨等先於上年十二月由信陽州竄湖北隨州之小林店天河口等處官大臣等飭派總兵趙克

彰等擊退十二月初三日竄桐柏之平市鎮初九日豫捻陳大澹一股由盤占山擁衆南趨與王庭幹會合約衆十餘萬竄入棗陽縣境本年正月二十四日總兵趙克彰王桐柏竝馬隊營總保升烏勒喜布統率馬步在棗陽縣之霸山會勦被賊圍困提督成大吉由德安先率馬隊馳援衝入營中併被圍裹維時賊壘賊館如櫛如壩我軍劈鞍以炊殺馬以食而軍氣堅忍不衰嗣總兵楊朝林由棗陽縣之草店馳往成大吉趙德彰王桐柏同困

圍中各密調在外分防各步隊腹背來攻斃賊三四千名焚賊壘館一百餘處於二十九日解圍藍二順一股由山陽竄入湖北鄖陽之上津堡道員梁作楫知府唐協和等會勦於正月二十一日收復上津賊分二路竄泗峪河大壩口等處

二月蘇州軍攻克浙江嘉興府城

提督程學啟統軍進逼嘉興賊之城守甚固官軍多傷亡又遇雨槍礮不能力攻綠營槍礮向用門藥必以火繩燃點風雨之時皆不能用今得西洋

法槍用銅帽礮用藥釘可免風雨之礙惟火藥外發爲雨所淋究不及晴霽之得力時沿江竄賊方警學啓思亟復嘉興抽兵西援乃繕攻具修礮臺以圖猛進二月十五六日分門攻擊賊拚死抗拒因督勇縛草膝行增築月牆以避槍礮環攻不息十七日用洋人名備雷者所製巨礮轟塌城垣百餘丈擊毀礮臺二十餘座賊爭負土填城闕學啓揮旂督衆詭欲登城俟賊聚益衆乃燃巨礮一發輒斃數百人連夜督親兵成浮橋二道濟師十八